



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 348/3 Prot

Tiranë, më 13.5.2016

VENDIM

Nr. 19, datë 13.5.2016

Në mbështetje të neneve 29, 30 dhe 32 të Ligjit Nr. 9887, datë 10.03.2008, "Për Mbrojtjen e të Dhënave Personale" i ndryshuar, Ligjit Nr. 8485, datë 12.05.1999, "Kodi i Procedurave Administrative të Republikës së Shqipërisë" i ndryshuar, si dhe provave të administruara në ngarkim të kontrolluesit, Spitali Universitar Obstetrik Gjinekologjik "Mbretëresha Geraldinë" Tiranë, me aktivitetin e tij në formën ligjore person juridik,

VËREJ SE :

Në zbatim të Urdhrit Nr.68, datë 18.03.2016 të Komisionerit për të Drejtën e Informimit dhe Mbrojtjen e të Dhënave Personale për kryerjen e hetimit administrativ, më datë 10.04.2016 e në vazhdim, pranë kontrolluesit si më lart cituar filloi procedura e hetimit administrativ, me objekt kontrolli:

- Zbatimi nga ana e kontrolluesit Spitali Universitar Obstetrik Gjinekologjik "Mbretëresha Geraldinë" Tiranë, i Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, dhe akteve të miratuara nga Komisioneri gjatë kryerjes së aktivitetit të tij, në lidhje me masat për sigurinë e të dhënave personale, në zbatim të nenit 27 të ligjit.

Nga hetimi administrativ i kryer pranë këtij kontrolluesi, nga grupi i inspektimit është konstatuar:

- I. Kontrolluesi nuk ka parashikuar në kontratën me punëmarrësit, Deklaratën e Konfidencialitetit, sipas Vendimit Nr.6 datë 05.08.2013, ku shifra e punëmarrësve të kontrolluesit që aksesojnë të dhëna personale në forma të ndryshme, është i konsiderueshëm. Nga verifikimi që ju bë dosjeve të punëmarrësve (mjek dhe infermier), në departamentin e burimeve njerëzore, nuk rezultonte asnjë deklaratë bashkangjitur kontratës së punës. Një deklaratë tip mbi konfidencialitetin i ishte bashkangjitur fotokopjes së rregullores tip të Zyrës së Komisionerit, por që mbante siglat e SUOGJ-së.

2. Në marrëdhëniet kontraktuale me të tretët- përpunuesit, kontrolluesi nuk ka parashikuar aneks kontratën sipas Udhëzimit Nr.19 datë 03.08.2012, pasi aneks kontrata sipas standartit të Udhëzimit 19, parashikon të drejtat dhe detyrimet e palëve, duke i formalizuar këto të fundit e duke i kthyer ato në efektive.

Faktet e mësipërme, përbëjnë shkelje administrative të neneve 20, 28 Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, si dhe akteve të Komisionerit, Vendimit Nr.6, datë 05.08.2013 dhe Udhëzimit Nr.19 datë 03.08.2012 të tij.

Në datë 22.04.2016, u mbajt proces verbali i konstatimit të shkeljeve për kontrolluesin *S.U.O.G.J. "Mbretëresha Geraldina" Tiranë*, ndërmjet grupit të inspektimit dhe përfaqësuesve të kontrolluesit. Përfaqësuesit e kontrolluesit, nuk shprehën pretendime me shkrim, pasi do i paraqiste ato në seancën dëgjimore.

Në cilësinë provës materiale, këtij procesverbali i bashkëngjiten këto dokumente:

- a-Kontratë me punëmarrësin
- b-Kontratë shërbimi
- c-Rregullore bazë e funksionimit të S.U.O.GJ-së
- d-Pamje nga ambjentet e kontrolluesit.
- e-Formular Njoftimi
- f-Rregullore për mbrojtjen e të dhënave personale me nr.408/1 prot., datë 25.03.2015.

Në zbatim të neneve 93-96 të Ligjit Nr.8485, datë 12.05.1999, "*Kodi i Procedurave Administrative të Republikës së Shqipërisë*" i ndryshuar, përpara marrjes së vendimit përfundimtar në respektim të së drejtës për t'u dëgjuar, në datë 09.05.2016, është organizuar seanca dëgjimore me përfaqësuesit e kontrolluesit, të cilët u shprehën se shkeljet e konstatuara nga grupi i inspektimit administrativ ishin rikuperuar, pretendime nuk u ngritën por u paraqitën dokumentacione që vërtetonin përmbushjen e konstatimeve të grupit të inspektimit.

Konstatimet e gjetura konsiderohen në shkelje dhe mosrespektim të kushteve dhe kritereve që parashikon Ligji Nr.9887, datë 10.03.2008, "*Për Mbrojtjen e të Dhënave Personale*" i ndryshuar, duke patur parasysh faktin që, kontrolluesi ka një periudhë të gjatë kohore që operon në mënyrë të paligjshme në përpunimin e të dhënave personale subjekteve të të dhënave, kryesisht pacientë.

Si përfundim, shkeljet e konstatuara gjatë hetimit administrativ në kuptim të nenit 39/1 gërma "dh" të Ligjit Nr. 9887, datë 10.03.2008 "*Për Mbrojtjen e të Dhënave Personale*" i ndryshuar, përbën kundërvajtje administrative dhe sanksionohet me gjobë, si më poshtë:

dh) kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë.

Kontrolluesi, "*Mbretëresha Geraldina*" Tiranë, në formën ligjore të aktivitetit të tij është person juridik dhe, sipas nenit 39/2 për kundërvajtjet e mësipërme, dënohet me me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, zyra e Komisionerit ka parasysh faktin se shkeljet e konstatuara janë serioze, për vetë fushën sensitive ku ato janë kryer, dhe janë të një përmase të konsiderueshme për nga numri i subjekteve të të dhënave personale.

Komisioneri gjithashtu, ka parasysh faktin që kontrolluesi, ka bashkëpunuar dhe reaguuar në rikuperimin e shkeljeve të konstatuara.

PËR KËTO ARSYE:

Në zbatim të neneve 28, 30, 31, 39/1, 39/2, gërma "dh", si dhe neneve 40 dhe 41 të Ligjit Nr. 9887, datë 10.03.2008 "Për Mbrojtjen e të Dhënave Personale" i ndryshuar,

V E N D O S A :

1. Dënimin e kontrolluesit, Spitali Universitar Obstetrik Gjinekologjik "Mbretëresha Geraldinë" Tiranë, me gjobë, në vlerën **100 000 (njëqind mijë) lekë** për shkelje të detyrimit të përcaktuar në nenin 28 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar.
2. Kontrolluesi, Spitali Universitar Obstetrik Gjinekologjik "Mbretëresha Geraldinë" Tiranë, të realizojë aneks kontratën tip të konfidencialitetit, sipas Udhëzimit Nr.19, datë 03.08.2012 të Komisionerit, për përpunimin e të dhënave personale nga palë të treta, me të cilët kontraktin për kryerjen e shërbimeve që ata ofrojnë, e për pasojë aksesojnë të dhëna të pacientëve të kontrolluesit.
3. Kontrolluesi, Spitali Universitar Obstetrik Gjinekologjik "Mbretëresha Geraldinë" të realizojë pajisjen e kontratave të punëmarrësve me Deklaratat e Konfidencialitetit sipas Vendimit Nr.6, datë 05.08.2013, brenda një periudhe prej 30 ditësh.
4. Gjopa arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
5. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot në, 13.5.2016

Besnik DERVISHI

KOMISIONERI